

大戴禮記

大戴禮記
十三卷

四部叢刊經部

上海涵芬樓借無錫
孫氏小綠天藏明表
氏嘉趣堂刊本景印
原書版匡高營造尺
六寸五分寬五寸

上海涵芬樓借無錫
孫氏小綠天藏明表
氏嘉趣堂刊本景印
原書版匡高營造尺
六寸五分寬五寸

右大戴禮十三卷總四十篇隋志所載亦十三卷而夏小正別爲卷唐志但云十三卷而無夏小正之別矣崇文總目則十卷而云三十五篇無諸本可正定也蓋自漢興得先儒所記禮書凡二百四篇戴德刪之爲八十五篇謂之大戴禮戴聖又刪德之書爲四十九篇謂之小戴禮今立之學官者小戴書也然大戴篇始三十九終八十一當爲四十三篇中間缺者四篇而重出者一篇兩篇七十三其上不見者猶三十八篇復不能合於八十五篇之數豈但當爲八十一耶

其缺者或既逸其不見者抑聖所取者也然哀
公問投壺二篇與小戴書無甚異禮察篇與經
解亦同曾子大孝篇與祭義相似則聖已取之
篇豈其文無所刪者也勸學禮三本見於荀卿
子至取舍之說及保傳則見於賈誼疏間與經
子同者尚多有之按儒林傳德事孝宣嘗爲信
都太傅聖則爲九江太守今德書乃題九江太
守未知何所據也大抵漢儒所傳皆出於七十
子之徒後之學者僅習小戴記不知大戴書多
矣其探索陰陽窮析物理推本性命雜言禮樂

之辨器數之詳必有自來以是知聖門之學無
不備也予家舊傳此書嘗得范太史家一本校
之篇卷悉同其訛缺謬誤則不敢改益懼其寔
久而傳又加舛也乃刊置建安郡齋庶可攷焉
淳熙乙未歲後九月潁川韓

元吉書

大戴禮記卷第一

漢九江太守戴

德撰

主言第三十九

哀公問五義第四十

哀公問於孔子第四十一

禮三本第四十二

主言第三十九

孔子問居曾子侍孔子曰參今之君子惟士與大夫之言之間也其至於君子之言者甚希矣於乎吾主言其不出而死乎哀哉曾子起曰敢

問何謂主言孔子不應曾子懼肅然摳衣下席
曰弟子知其不孫也得夫子之間也難是以敢
問也孔子不應曾子懼退負序而立孔子曰參
女可語明主之道與曾子曰不敢以爲足也得
夫子之間也難是以敢問孔子曰吾語女道者
所以明德也德者所以尊道也是故非德不尊
非道不明雖有國焉不教不服不可以取千里
里一本雖有博地衆民不以其地治之不可以
作理霸王是故昔者明主內脩七教外行三至七教
脩焉可以守三至行焉可以征七教不脩雖守

不固三至不行雖征不服是故明主之守也必
折衝乎千里之外其征也衽席之上還師是故
內修七教而上不勞外行三至而財不費此之
謂明主之道也曾子曰敢問不費不勞可以爲
明乎孔子愀然揚麋麋一作眉曰參女以明主爲勞
乎昔者舜左禹而右臯陶不下席而天下治夫
政之不中君之過也政之旣中令之不行職事
者之罪也明主奚爲其勞也昔者明主關譏而
不征市廛而不稅稅十取一使民之力歲不過

三日入山澤以時有禁而無征

一時入山澤以時而不禁夫圭

曰無

此六者取財之路也明主捨其四者而節

其二者明主焉取其費也曾子曰敢問何謂七

教孔子曰上敬老則下益孝上順齒則下益悌

上樂施則下益諒上親賢則下擇友上好德則

下不隱

一作上好德則下隱

上惡貪則下耻爭上強果

則下廉耻民皆有別則貞則正亦不勞矣此謂

七教七教者治民之本也教定是正矣上者民

之表也表正則何物不正是故君先立於仁則

大夫忠而士信民敦工璞商懋女憧婦空空七

者教之志也七者布諸天下而不窳內諸尋常

之室而不塞是故聖人等之以禮立之以義行之以順而民弃惡也如灌曾子曰弟子則不足道則至矣孔子曰參姑止又有焉昔者明主之治民有法必別地以州之分屬而治之然後賢民無所隱暴民無所伏使有司日省如時考之歲誘賢焉則賢者親不肖懼使之哀鰥寡養孤獨恤貧窮誘孝悌選賢舉能此七者修則四海之內無刑民矣上之親下也如腹心則下之親上也如保子之見慈母也上下之相親如此然後令則從施則行因民旣邇者說遠者來懷然

後布指知寸布手知尺舒肘知尋十尋而索百步而堵三百步而里千步而井三井而甸烈三甸烈而距五十里而對百里而有都邑乃爲畜積衣裘焉使處者恤行者有興亡是以蠻夷諸夏雖衣冠不同言語不合莫不來至朝覲於王故曰無市而民不乏無刑而民不違畢弋田獵之得不以盈宮室也徵歛於百姓非以充府庫也慢怛以補不足禮節以損有餘故曰多信而寡貌其禮可守其信可復其跡可履其於信也如四時春秋冬夏其博有萬民也如飢而食如

渴而飲下土之人信之夫暑熱凍寒遠若邇非
道邇也及其明德也是以兵革不動而威用利
不施而親此之謂明主之守也折衝乎千里之
外此之謂也會子曰敢問何謂三至孔子曰至
禮不讓而天下治至賞不費而天下之士說至
樂無聲而天下之民和明主篤行三至故天下
之君可得而知也天下之士可得而臣也天下
之民可得而用也會子曰敢問何謂也孔子曰
昔者明王以盡知天下良士之名既知其名又
知其數既知其數又知其所在明主因天下之

爵以尊天下之士此之謂至禮不讓而天下治
因天下之祿以富天下之士此之謂至賞不費
而天下之士說天下之士說則天下之明譽興
此之謂至樂無聲而天下之民和故曰所謂天
下之至仁者能合天下之至親者也所謂天下
之至知者能用天下之至和者也所謂天下之
至明者能選天下之至良者也此三者咸通然
後可以征是故仁者莫大於愛人知者莫大於
知賢政者莫大於官賢有土之君修此三者則
四海之內拱而俟然後可以證明主之所征必

道之所廢者也彼廢道而不行然後誅其君致其征弔其民而不奪其財也故曰明主之征也猶時雨也至則民說矣是故行施彌博得親彌衆此之謂衽席之上乎還師

哀公問五義第四十

魯哀公問於孔子曰吾欲論吾國之士與之爲政何如者取之孔子對曰生乎今之世志古之道居今之俗服古之服舍此而爲非者不亦鮮乎哀公曰然則今夫章甫句屨紳帶而搢笏者此皆賢乎孔子曰否不必然今夫端衣玄裳冕

而乘路者志不在於食葷斬衰簡履杖而歆粥者志不在於飲食故生乎今之世志古之道居今之俗服古之服舍此而爲非者雖有不亦鮮乎哀公曰善何如則可謂庸人矣孔子對曰所謂庸人者口不能道善言而志不邑邑不能選賢人善士而託其身焉以爲已憂動行不知所務止立不知所定日選於物不知所貴從物而流不知所歸五鑿爲政心從而壞若此則可謂庸人矣哀公曰善何如則可謂士矣孔子對曰所謂士者雖不能盡道術必有所由焉雖不能